

Mošomedi wa maloba wa SARS o hwetša kotlo ya mengwaga ye 12 kgolegong

Tshwane, 24 Janaware 2022 – Mošomedi wa maloba wa Ditirelo tša Motšhelo tša Afrika Borwa (SARS) Bilal Shaik o hweditše kotlo ya mengwaga ye 12 kgolegong bakeng sa bomenetša, kutso ya leina, go bolela maaka le tlhatswišo ya tšhelete, ya palo ya R6-million.

Shaik o golegilwe bakeng sa nolofatši ya bomenetša bja tefelamorago ya VAT go dikhamphani tše tharo. Le ge ge go le bjalo, tšhelete e feleditše e le ka akhaonteng ya Shaik yo a dirišitšego poelo go ikhola.

Mogononelwa wa bobedi, Kyle Nadasen yo a emetšego Kyle Nadasen CC, o be a ahloletšwe bomenetša, kutso ya leina le go bolela maaka. O ahloletšwe mengwaga ye tshela kgolegong, gomme a fegwa ka botlalo bakeng sa mengwaga ye mehlano, ka peelano ya gore mogononelwa ga a ahlolwa ka fase ga karolo ya 4 ya Molao wa Thibelo ya Bosenyi bja go Beakanywa (POCA), ka nako ya phego.

Mogononelwa wa boraro, Miloni Chetty, leloko le le tee fela la ILONIM General Traders, o ile a lokollwa gomme a se bonwe molato go melato ka moka.

Kgorotsheko e kwele gore bagononelwa ba rometše lenaneotheko la maaka ka morero wa go amogela tefelamorago yeo e sa ba swanelago ya VAT.

Khomišinare wa Ditirelo tša Motšhelo tša Afrika Borwa (SARS), Edward Kieswetter, o amogetše kahlololelo e šoro yeo e filwego mošomedi wa maloba wa ka SARS Bilal Shaik le Kyle Nadasen.

“SARS e ka se kgotlelele maitshwaro afe goba afe a bosenyi bja bašomedi ba yona. Se ga se rerišege le ga tee, ka ge balefela motšhelo le bagwebi ba swanetše go tshepha setheo le bašomedi ba sona go šoma ka botshephegi. SARS e ikemišeditše go thatafaletša le go lefiša dikotlo tša godimo go motho yo mongwe le yo mongwe yo a amegago mererong ya bosenyi bja merero ya motšhelo ntle le go fiega, kgaugelo le kgethollo. SARS e nyamišwa ke bašomedi ba bangwe ba maemo a godimo bao ba amegago mererong ya bosenyi. Re tla ba utulla,” Khomišinare a tšwelapele ka go realo.

“Bosenyi bja mohuta wo bo senya botumo bja setheo se bohlokwa sa temokrasi ya rena yeo e imollago obamelo ka boithapo ya balefela motšhelo le bagwebi go phethagatša tagafara ya yona ya go koleka ditseno tšeo di ka dirišwago go hola MaAfrika Borwa ka moka, kudu bahloki le bao ba šaparegilego,” Mrn. Kieswetter o boletše bjalo.

Go hwetša tshedimošo enngwe ikgokaganye le SarsMedia@sars.gov.za